

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- मुख्यमंत्री उमर अब्दुल्ला होरें आखेआ ऐ जे बुधवारें बिजली दे नुक्सान पर रोक लाने ते बिजली ढांचे गी आधुनिक बनाने लेई नमें सिरिया तैआर कीती गेदी आरडीएसएस स्कीम लागू कीती जा'रदी ऐ।
- सेहत ते मैडिकल शिक्षा मंत्री सकीना इत्तू होरें आखेआ ऐ जे लोकें गी अेहतर सेहत सेवा उपलब्ध कराने लेई पूरी यूटी च सेहत ढांचे च बेह्तरी आंदी जा करदी ऐ।
- उपमुख्यमंत्री सुरिन्दर चौधरी होरें पूरे जम्मू कश्मीर च बेहतर सड़क राबते लेई जारी परियोजनाएं च तेजी आन्नने दा भरोसा दोआया ऐ।
- नशाखोरी पर रोक लाने ते एहदे माड़े असर बारे लोकें गी जागरूक करने लेई पूरे प्रदेश च इक व्यापक जागरूकता अभियान शुरू कीता जाग।

<><><><><><>

CM Power

मुख्यमंत्री उमर अब्दुल्ला होरें आखेआ ऐ जे जम्मू कश्मीर च बिजली ढांचे गी भलेया अज्जै कल्लै दे ढंगै साब्वै तैआर करने ते इस क्षेत्र च होने आले नुक्सान गी पूरने लेई नमें सिरिया तैआर कीती गेदी बिजली दी बंड सरबंधी आरडीएसएस नां दी स्कीम गी अमल च आंदा जा करदा ऐ। कल विधानसभा च शक्ति राज परिहार हुंदे आस्सेआ पुट्टे गेदे इक सुआले दा परता दिंदे होई मुख्यमंत्री होरें आखेआ जे जम्मू कश्मीर च बिजली दी बंड सप्लाई दरान होने आला नुक्सान मुल्खै च सब्बने शा मता ऐ ते इस करियै जिच्चर अस इस स्थिति पर काबू नेई पाई लैंदे साढ़ा सिद्धा सिद्धा 50 प्रतिशत यानि बिजली दा अददा अद घाटे च गै चलदा रौहग। स्कीम बारे तफसील पेश करदे होइ मुख्यमंत्री होरें आखेआ.....

<><><><><><>

CM-ESRLA

मुख्यमंत्री उमर अब्दुल्ला होर अज्ज विधानसभा च 2024–25 बरें दा आर्थिक सर्वेक्षण पेश करगन। आकाशवाणी दे जम्मू संवाददाता नै जानकारी दित्ती ऐ जे मुख्यमंत्री जिंदे कश प्रदेश दे खजाना विभाग दी बी जिम्मेदारी ऐ, 2025–26 बरें दा सलाना बजट पेश करने कोला इक रोज पैहले अज्ज आर्थिक सर्वेक्षण दी रिपोर्ट सदन च रखगन। आर्थिक सर्वेक्षण दी रिपोर्ट च जम्मू कश्मीर दी मजूदा माली स्थिति गी पेश कीता जाग।

<><><><><><>

Sakina Health

सेहत ते मैडिकल शिक्षा मंत्री सकीना इत्तू होरें आखेआ जे जम्मू कश्मीर च मजूदा उपलब्ध सेहत सुविधाएं दा दर्जा बधाइयै उंदे च बेह्तरी आंदी जा करदी ऐ तां जे लोकें गी इलाज मोआलजे दियां मयारी सेवां सुविधा उपलब्ध होई सकन। डॉ. नरिंदर सिंह हुंदे आस्सेआ कल विधानसभा च जम्मू दे सैनिक कालोनी ते ग्रेटर कैलाश इलाके च उपलब्ध सेहत सेवाएं बारे पुच्छे गेदे इक सुआले दे परते च सकीना इत्तू होरें आखेआ जे राष्ट्रीय सेहत मिशन तैहत उत्थें उपलब्ध शैहरी सार्वजनिक सेहत केन्द्र च 5 नियमित डाक्टर ते पीम डाक्टरी बमला ते 8 बाद्दू डाक्टर ते नीम डाक्टरी अमला उपलब्ध ऐ। उनें दस्सेआ जे नमीं किस्म दे सार्वजनिक सेहत केन्द्र 1 कोला 3 किलोमीटर दे छिंडे पर उपलब्ध न जियां जे छन्नी हिम्मत, उपकेन्द्र सैनिक कोलानी ते उपकेन्द्र लोअर चोहादी च एहदे इलावा इस इलाके च बड्डे स्तरै पर सेहत सेवाएं लेई 3 कोला 6 किलोमीटर दे छिंडे पर राजीव गांधी अस्पताल गंग्याल, सरकारी अस्पताल गांधी नगर ते सरकारी मैडिकल कालेज जम्मू ते एहदे सहायक अस्पताल बी उपलब्ध न। मंत्री होरें दस्सेआ जे आयुष्मान भारत–प्रधानमंत्री जन आरोग्य योजना–सेहत स्कीम, जम्मू कश्मीर दे सब्बने बसनीकें लेई सेहत बीमा स्कीम ते केई प्राइवेट अस्पताल बी सैनिक कालोनी ते ग्रेटर कैलाश इलाके च लाभार्थिं गी इनें स्कीमें तैहत सुविधा उपलब्ध करा करदे न।

<><><><><><>

Sakina Model School

शिक्षा मंत्री सकीना इत्तू होरें जम्मू कश्मीर विधानसभा गी जकीन दोआया जे कडुआ जिले दे लोहाई मल्हार इलाके च इक मॉडल स्कूल दी इमारत दे निर्माण दा कम्म तौले गै शुरू होग। मंत्री सकीना इत्तू होरें आखेआ..

<><><><><><>

DC-DLRC Meet

बैंकें ते माली संस्थाने दे प्रदर्शन दा जायजा लैने आस्तै कल जम्मू जिले दे डिप्टी कमीशनर सचिन कुमार वैश्य हुंदी अध्यक्षता च डिस्ट्रिक्ट लैवल रवीयू कमेटी यानि जिला सतह दी जायजा कमेटी दी इक बैठक लग्गी। बैठक दे दरान पिछली तिमादी च दोहार जमा अनुपात च सुधार दिखेआ गेआ। इस मौके पर बोलदे होई डीसी जम्मू होरें प्राथमिकता आले खेत्तर दे कर्ज गी होर बधाने दी जरूरत पर जोर दित्ता ते बैंक गी निर्देश दित्ता जे ओ सरकार आस्सेआ प्रायोजित मामले च कर्ज मंजूर करने ते बंडने च तेजी आहन्न। बैठक च विशेष तौरा पर “प्रधानमंत्री सूर्य घर मुफ्त बिजली योजना” पर ध्यान केन्द्रित कीता गेआ। डीसी जम्मू होरें इस योजना दे प्रचार प्रसार लेई विशेष कैप लाने ते लाभार्थीएं गी माली मदाद उपलब्ध कराने पर जोर दित्ता।

<><><><><><><>

Dy. CM Roads

उपमुख्यमंत्री सुरिंदर चौधरी होरें लकीन दोआया ऐ जे जम्मू कश्मीर च जारी बक्ख-बक्ख सड़क परियोजनाएं दे कम्मै च तेजी आन्नियै इनें गी मित्थे गेदे समें दे अंदर अंदर मुकम्मल कीता जाग। विधानसभा च जफर अली खटाना हुंदे इक जिमनी सुआल दा परता दिंदे होई उपमुख्यमंत्री होरें जानकारी दित्ती जे मार्च 2023 च बकाया कम्में गी तोड़ चाढ़ने सरबन्धी स्कीम दे तैह्त हिल्लर थमां लेइयै वंदे वेलगम तोड़ी परानी ब्रिगी कनाल दे कंडे कंडे आली सड़कै गी पक्का करने दा कम्म तोड़ चाढ़ेआ गेआ ऐ। उनें जानकारी दित्ती जे हंगल-गुड खारपोरा सड़कै दा कम्म प्रधानमंत्री ग्राम सड़क योजना दे तैह्त 2022 च मुकम्मल कीता गेआ। इक होर सुआलै दे लिखियै दित्ते गेदे जोआब च उपमुख्यमंत्री होरें जानकारी दित्ती जे हंगल-गुंडपूरा आली सड़कै गी वैड़ा करियै एह्दा दर्जा बधाने दा फिलहाल कोई प्रोग्राम नेई ऐ। नाबार्ड आस्सेआ जारी रकमें दे बारे च उनें दस्सेआ जे एह्दे तैह्त मजूद परियोजनाएं लेई पैहा सालोसाल परियोजनाएं तैह्त लागत ते होए दे कम्में साब्वै जारी कीता जंदा ऐ।

<><><><><><><>

CS-Drug Campaign

मुख्य सचिव अटल डुल्लू होरें कल इक बैठक दी अध्यक्षता करदे होई सूचना विभाग आस्सेआ चलाए जाने आले प्रदेश सतह दे इक व्यापक जागरूकता अभियान लेई तैआरिएं दी समीक्षा कीती जेह्दा मुख्य मकसद लोकें गी नशाखोरी दे माड़े असर ते एह्दे कोला बचाह लेई लोकें गी शिक्षित ते जानकार बनाना ऐ। बैठका च सब्बने जिलें दे डीसीएं वीडियो कांफ्रेंसिंग राएं शिरकत कीती। मुख्य सचिव होरें हर जिले च विषय दे माहिरें गी सिखलाई देने पर जोर दित्ता जेह्दे ब्लाकख पंचैत ते होरने बक्ख-बक्ख सतहें पर लाई जाइयै जागरूकता लेई उपलब्ध होंगन।

उनें आखेआ जे अभियान गी कामयाब बनाने लेई सरबंघत सब्बने धड़ेंगी मिलियै कम्म करना होग ते नशाखोरी खलाफ हर कुसै गी जागरुक बनाने च सूचना विभाग दी भूमका मती महत्वै आली रौहग।

<><><><><><>

Ramban Health

रामबन जिले च लोकें दी सेहत दिक्खभाल गी जकीनी बनाने आस्तै ड्रग कंट्रोल मैहकमा रामबन पाससेआ केई पैहलकदमियां कीतियां जा'रदियां न। मैहकमे आस्सेआ दुआइएं दे बपार च नैतिकता जकीनी बनाने लेई दुआइएं दी गैर कनूनी बंड गी रोकने आस्तै हाल च गै इक मुहिम चलाई गई तां जे लोकें दी सेहत दिक्खभाल गी जकीनी बनाया जाई सकै। साढ़े रामबन जिले दे संवाददाता कन्नै गल्ल करदे होई असिस्टेंट कंट्रोलर ड्रग रामबन संजीव कुमार गुप्ता होरें आखेआ

<><><><><><>

Empowered Committee Meet

ग्रामीण विकास ते पंचायती राज मैहकमे दे सचिव मोहम्मद एजाज असद होरें कल ब'रे 2025-26 लेई मनरेगा, प्रधानमंत्री आवास योजना(ग्रामीण), जम्मू कश्मीर ग्रामीण आजीविका मिशन ते हिमायत आस्तै सलाना कार्य योजना गी खीरी रूप देने आस्तै आयोजित होने आली बाइख्तेयार कमेटी दे सत्र शा पैहले इक प्रस्तावक बैठक दी अध्यक्षता कीती। बैठक दे दरान सचिव होरें सलाना कार्य योजना तैहत् मुख्य कार्यक्रम रणनीतिएं ते माली बंड बारे जायजा लैता। बैठक च मनरेगा योजना दे तैहत् रोजगार सृजन, प्रधानमंत्री आवास योजना-ग्रामीण दे तैहत् ग्रामीण इलाकें च रौहने आले कमजोर वर्गें दे लोकें गी आवास उपलब्ध कराना, राष्ट्रीय ग्रामीण आजीविका मिशन दे तैहत् स्वरोजगार लेई पैहलकदमियां ते हिमायत योजना दे तैहत् कौशल विकास बारे विस्तार कन्नै चर्चा कीती गई।

<><><><><><>